

**Samichlaus wo chunnsch du här?**  
Samichlaus wo chunnsch du här?  
Warum isch au din Sack so schwär?  
Bisch de ganzi Wald dur gloffe?  
Häsch villicht s'Christchindli troffe?  
S'hät sicher gseit es chämi au scho gli,  
Gäll Samichlaus, ich bin es liebs Chind gsi!

### De Samichlaus und d'Tier im Wald

Alli Tier im Wald sind froh,  
sie gsehnd de Samichlaus döt cho.  
De gueti Ma bringt ene Zässe,  
er hat d'Tier no nie vergässe.

Es git Heu und anderi feini Sache,  
sogar Nussbrot het de Chlaus no bache.  
Em Haas will er es Rübli geh,  
freve tüend sich Müsli, Dachs und Reh.

Träume tüend diä Tier devo,  
eimol mit em Chlaus zu de Chinde z'goh,  
eimol em Chlaus sin Begleiter z'si,  
wie de Esel im Laterneschy.

Öbs da Johr e Überraschig git  
und d'Waldtier dörfed mit?  
Alli Tier im Wald sind froh,  
de Samichlaus isch zu ene cho.

### E Liechtli

E Liechtli chunnt de Feldweg i,  
i glaub das muess de Samichlaus si.  
Jetzt ghört me s'Glöggli, losed ganz guet,  
wie's über d'Wiese lüete tuet.  
Mis Herz chlopft ganz fest,  
i hoffe, du weisch vo mir grad s'Best.  
Die andere, chline, dumme Sache,  
wett i s'nögest Johr besser mache.  
Drum bitte lueg in Sack und leer en us,  
bevor du gohst isch nöchste Huus.

### Samichlaus du guete Maa

Samichlaus du guete Maa  
ändlich bisch du wieder da.  
Chonsch cho luege, was ich mache  
wien ich spiele, singe und lache.  
Tuesch mich lehre, s' Hätz zverschänke  
und e chli a anderi danke.  
Nur so bin ich sälber froh  
unds Christchind cha zumer cho.

### De Samichlaus spannt s'Eseli a

De Samichlaus spannt s'Eseli a,  
de Schlitte isch scho g'richtet.  
«Es seg jetzt öppe Zit für d'Reis»  
hät er am Schmutzli brichtet.

De Mantel hät er bürstet gha,  
und d'Stiefel putzt ganz guet!  
Er überleit, wa gschiider sei,  
e Chappe oder en Huet?

Sis Eseli schüttlet stolz de Chopf,  
es trägt en Gloggechranz.  
Da glögget lustig dür de Wald,  
grad wie en schöne Tanz!

Er fährt direkt am Dörfli zue,  
und chunt zu Ziit det a.  
Er hofft, dass er viel Chinde trifft,  
won er belohne cha.